

KIA TA DEN CAY DEN OTRO



**COALICION MEP-RAIZ
NO TIN DERECHO DI
EXISTENCIA MAS**

**ABOGADO MR. KOCK TA ENFATISA:
SAYURI A
PERDE SU BIDA
ACCIDENTALMENTE**

BOTICA NA WARD - WEEKEND

ORANJESTAD

Benu Botica Oduber
Caya G.F. Croes 103
(297) 5821780

SAN NICOLAS

Botica di Serv. Seroe Preto
Weg Seroe Preto 25
(297) 6408443



Stop Searching for Content!

Find and access content based on *what it is*, not where it is saved



M-Files®

Intelligent Information Management

- System Neutral, Metadata Driven
- Cloud, On-Premises, or Hybrid
- Automated Workflows
- Seamless Integration with Microsoft Office and more

VCC
International NV

Tel. 583-7072 | info@vcc-int.com | www.vcc-int.com

KIA ta den cay den otro

For di tempo di Minister di Husticia Andin Bikker a haci un evaluacion di estado di instituto coreccional di Aruba, KIA. Mester construi un prizon nobo. E tempo ey a papia hasta di construi un prizon den Colony, cu no a cay na agrado di pueblo. Na 2014 un comision Europeo a bin controla y bisa cu KIA practicamente no ta sirbi. Awe, 9 aña despues, a constata cu tabatin algun “facelifting” pero en realidad, en general e estado deplorable no tin otro nomber pa describie.

E comision den su rapport di 2022 ta reconoce e esfuersonan haci pa mehora condicion di e materialnan den e establecimiento, por ehempel mayoria di dak, lock y portanan a wordo drecha of cambia, diferente muraya den e prizon ta renoba y tin un laundry nobo bou di construccion.

A pesar di e esfuersonan ey, diferente deficiencia identifica den pasado a keda mescos, condicion di materialnan ta pover. Particularmente a nota cu e muraya na diferente parti di e prizon ta casca, vloernan ta dañá, pleister y concreto a cuminsa kita di e murayanan, baranan di plaffon y heronan di structuranan di concreto ta frustia y exponi.

Mayoria di celnan, cu un midi di 9.5 m2, sin e parti sanitario na banda, tin tres prizonero y ta limita e espacio. Banda di esaki, e parti sanitario ta parcialmente dividi for di resto di e cel. E celnan aki no ta ekipa cu un bel. Mayoria di e celnan bishita door di e delegacion tabata sushi y sin suficiente iluminacion artificial. A constata hopi plas di awa pega na varios parti di e prizon, incluyendo den e area di ehercicio pafo, m como den areanan paden (camber di actividad comun).

Un biaha mas a recomenda pa tuma e pasonan necesario pa atende cu e



estado decai y ruina di KIA. E cantidad di persona den cada cel no por ta mas cu dos. Percura cu mester tin suficiente iluminacion den tur cel, separa e parti sanitario completamente den cada cel y ekipa e celnan cu un bel, ta aspectonan cu mester atende di forma urgente.

Un otro punto cu a wordo condena fuertemente ta e situacion di un prizonero hoben cu ta den rolstoel. E luga no ta adecuado pa personanan asina. E persona aki awo ta acomoda den e Unidad di Extra Siguridad (EBA) y ta algo cu tin preocupacion di e comision. E prizon en si no ta adapta pa necesidadnan specifico di personanan asina y e prizonero concerni tabata completamente dependiente di e bon voluntad di su compañeronan pa cu su rutina diario ya cu e mester

wordo carga pa bay su citanan medico, bishita, haci yamada telefonico y pa bay haci ehercicio na aire liber,

Pero mas alarmante ta cu e facilidad sanitario den su cel no ta adapta y e mester haya ayudo di otro personanan ki ora cu e mester bay toilet of tuma un baño.

E comision a bisa cu e situacion aki no ta permitie hiba un bida digno den KIA y por conduci na un trato degradante

Nan a recomenda Aruba pa tuma e pasonan necesario pa sigura cu e prizonero concerni, como cualkier otro cu un deshabilidad fisico admiti ey den futuro, ta deteni den condicionnan digno. Si no por crea un ambiente digno na KIA, mester traslada e preso en cuestion pa un otro institucion mas adecuado.

Coalicion MEP-RAIZ no tin derecho di existencia mas



Aruba no merece e gobierno cu e tin na e momentonan aki, simplemente un gobierno di coalicion cu no ta sirbiendo interes di pueblo cu no ta su propio interes partidista y caminda ya ta conoci cu no tin perspectiva cu cos lo drecha dentro di poco.

Ta un berguensa por ehempel con diahuebs ultimo, Minister Ursell Arends a dicidi di interveni den un proyecto misionario di turismo, pa hunga un wega cu e mes no ta comprende, poniendo cara di Prome Minister na berguensa, lubidando por completo riba ley y reglanan existente.

Un gobierno cu no a inverti den e pais aki den ultimo añanan, awor tin e pudor di suspende un proyecto misionario cu for di algun aña caba ta den ehecucion.

Ta tristo cu mester constata cu Minister Arends, tambe awor ta dominando e arte di gañamento, ya cu na radio ayera mainta e ta declara cu e no a bay pa para trabou ya cu e tabata riba caminda di bay “lunch” cu su Mama ora cu el a ripara e actividad cu tabata tumando luga na e sitio.

Con un hende ta bay lunch ‘mainta’ pero ta dicidi di bay na e sitio caminda e ta bisa e desaroyado di e proyecto cu e tin cu papia cu “su” abogado, pues cu otro palabra e no tabatin nada di haci of busca na e sitio aki.

Ta bin acerca cu el a dicidi despues di entabla un caso den corte pa para e proyecto, lantando un caso contra di su

propio gobierno, contra di su propio Minister Presidente, luchando contra di propio rumannan di Minister Glenbert Croes involvi den henter e discusion aki.

Minister Arends a bay Magic mainta y insisti cu e ta defende cu tur su forza, naturalesa di su pais, lubidando por completo cu algun meter mas pazuid di e sitio, e no a soluciona ainda e awa preto for di Bubaliplas cu ta bay lama y e holo stinki cu hotelnan ta confrontando.

Pero no por ta otro ya cu na fin di aña pasa, e mandatario su hefe, Prome Minister Wever Croes, a dicidi di pidi Secretario di Estado Alexandra van Huffelen, pa e duna un splicacion riba e discusion cu a surgi pa reinstitui e 12.7% di reduccion salario na trahadonan publico, bisando entre otro: “nan ta kere cu mi ta gaña.”

Tweede Kamer a ricibi un mocion di Parlamentario Kamminga e siman aki caminda ta pidi pa no duna Aruba refinanciamiento di debe otorga durante di pandemia na un interes faborabel si no aproba e RAft, cual ta un palabracion cu e Prome Minister a haci cu Hulanda cu Parlamento lo pasa e ley aki.

Aruba definitivamente no tin un gobierno integro, no tin un gobierno cu ta respeta su mes y simplemente e pais tin un gobierno cu no tin solucion pa pueblo, al contrario ta creando situacionnan cu lo costa e pais mas placa den futuro, mirando e posibilidad grandi cu inversionistanan di e proyecto di Embassy Suites, lo por inicia un caso di daño y perjuicio contra di gobierno.



Mirrors Beauty Academy ta ofrece e siguiente servicionan

Laba
Corta
Blowdry
Keratina
Cold Wax

Tinja
Highlights / Mechitas
Ombre / Californiana
Bayalage
Peinado

Makeup
Threading
Barberia
Manicure
Pedicure

Y
mucho
mas!

Tel. Alejandro: 564-4412 of 582-0110 • Whatsapp: 732-0110 of 566-0110 • Adres: Ponton 76 - Suite #3

Analisis

Mocion ta confirma cu Gabinete Wever Croes ta e problema di pais Aruba

Analizando e asunto di mocion cu Roelien Kamminga di VVD cu firma di fraccion di CDA a entrega den Tweede Kamer pa loke ta e 'Rijkswet Aruba financieel toezicht', con cu bira e mocion aki, e hecho ta keda cu Gabinete Wever Croes II no ta di confia cu su maneho di financia di pais Aruba.

No tin otro forma pa mira e mocion aki ya cu en realidad ta solamente dos punto di preocupacion Kamminga y CDA tin pa loke ta refinanciamiento di e debe di 441,7 milyon euro, esta cu Hulanda ta teme cu gabinete Wever Croes II, lo no tene su mes na palabracionnan cu ya nan no ta respetando pa mas cu cuater aña caba.

Un di e puntonan den e mocion di Kamminga, el a muestra cu e cuota di debe di pais Aruba, ainda ta hopi halto y cu esaki ta hopi mas halto pa un porcentahe normal pa loke e ta yama 'a small island economy.'

Hecho ta cu Tweede Kamer simplemente no tin confiansa den gabinete Wever Croes II mirando cu e gobierno aki no ta tene su mes na palabracionnan acorda y firma pa Prome Minister di e pais.

Gabinete Wever Croes I y II tin un historia financiero bon conoci na Aruba, caminda hasta den Tweede Kamer a ser muestra na varios cu e gobiernonan aki, ta ehecuta un maneho pa sirbi "friends and family" na luga di sirbi interes di e pueblo.

E punto central di e mocion ta cu tanto VVD y CDA kier mira un "control" serio riba e actual gobierno di Aruba mirando cuanto bes a cambia di opinion, a cuestiona hasta nan propio decisionnan manera reduccion salarial di trahadonan publico y recientemente e proceso di reduccion den cuida medico pa medio di AZV cu gobierno a dicidi di no sigui ehecuta.

Ora cu analisa cu den pasado van Huffelen a informa Tweede Kamer cu e situacion financiero di Corsou ta di tal indole cu e debe di e isla aki lo tuma siglonan prome cu e wordo paga

totalmente, e situacion di Aruba ta totalmente diferente.

Ningun caminda den e mocion ta ser muestra cu Aruba su capacidad financiero lo forma un problema pa pago di e debe aki, ya cu cifranan cu ta muestra y confirma, cu e situacion financiero di Aruba, ta totalmente diferente cu e situacion financiero di tanto Corsou y Sint Maarten.

Aki por muestra riba e rapport di Raad van Advies caminda a publica cu segun presupuesto di pais Aruba pa 2023, gobierno di Aruba ta ricibi na impuesto indirecto, e suma di 1.107.789.000, pues un entrada di mas cu un biyon florin, cual ta mas cu e debe di 898 milyon di debe cu Aruba tin cu Hulanda pa loke ta e sosten financiero durante di e pandemia.

E lista cu Raad van Advies a publica den su rapport riba e ley di BBO na frontera ta muestra caba cu e entrada mayor segun presupuesto 2023 pa gobierno ta e BBO/BAVP un ley cu a wordo introduci pa haci mota politico cu partido AVP pero esakinan ta produci 312.615 milyon florin pa gobierno.

E ley di BAZV ta produci 234.461 milyon florin pa caha di gobierno mientras cu na 'invoerrechten' ta drenta e suma di 200 milyon pa 2023, sigui pa e 'toeristenheffing' cu ta produci e suma di 125.282 milyon florin mientras cu pa loke ta 'accijnzen', caha di gobierno lo ricibi pa 2023, e impresionante suma di 162.652 milyon florin.

Despues ta bin dos cu ta produci menos pero cu tog ta hopi mirando cu 'speelvergunningsrecht' ta trece 22.779 milyon den caha y 'deviezenprovisie' ta trece e suma di 50 milyon den caha di gobierno.

Ta un economia cu ta draai cu hopi placa pero e falta di un maneho serio, un falta di un maneho responsabel, ta loke ta e preocupacion mas grandi di Hulanda, sigur pa loke ta trata e mal fama di gabinete Wever Croes II, confirmando asina cu e problema mas grandi di pais Aruba, ta e gobierno di Prome Minister Evelyn Wever Croes.

Abogado mr. Kock ta enfatisa:

Sayuri a perde su bida accidentalmente

E caso unda un hoben mucha muhe (Sayuri Petronia) a perde su bida a bin hopi dilanti den prensa. Hasta na luna di juni 2023 ainda ta bin den prensa bisando cu Sayuri a ser “mata”, pues indicando cu Sayuri lo a ser “mata deliberadamente”. Publico pues ta bay pensa cu aki ta trata di un caso cu un hoben a ser asesina intencionalmente. ESAKI NO TA BERDAD !! Esaki ta loke e abogado di e acusado Izaak Principaal, esta Albert Kock ta bisa den un declaracion manda pa prensa. Como abogado di e mucha homber involvi (IP) mi ta haya mi mes obliga di splica e caso, awor cu Hues den prome instancia (eerste aanleg) a dicta sentencia y cu e mucha homber involvi a apela e sentencia di hues na Corte Superior.

Hues di Eerste Aanleg (Corte) den su sentencia di 5 october 2022 a huzga como lo siguiente:

“Igual cu e Fiscal, Corte ta husga cu for di e dossier (documentonan) y loke a bin dilanti durante tratamento di e caso a resulta cu e sospechoso IP NO tawata intencional e morto di Sayuri. Huez ta sigui bisa cu e ta haya su mes dilanti e pregunta si por papia aki di “voorwaardelijk opzet””


“Voorwaardelijk opzet” ta ora un persona a causa resultado di algo (manera morto di un persona) unda bo por bisa cu e persona, cu su acto, a expone su mes “a sabiendas y boluntariamente” na e chens grandi cu su acto lo POR causa morto di e otro persona. Pues ban bisa, bo NO tin e intencion di causa su morto pero cu bo acto irresponsabel bo a causa su morto.

Anto e Hues di Corte na Aruba a conclui cu tawatin voorwaardelijk opzet di IP. Fiscal a pidi 9 aña y Hues a duna IP 9 aña di prizon. E anochi di e morto tragico di Sayuri tawatin 3 persona den e cas (IP, Sayuri y ZC). ZC a bin cu e arma, a pone riba mesa den sala. E prome cu a hunga cu e arma tawata Sayuri, luego IP, anto hungando cu e arma, e pia di e stoel di plastic blanco lo a dobla y dede di IP accidentalmente a primi riba e trekker (gatillo) di e arma, bala a sali y a dal Sayuri, cu net

na e momento ey a lanta para, den su cabes. E unico persona presente como testigo tawata ZC. ZC na recherche y na Corte papiando cu Hues semper a keda ripiti e palabranan: “ E (IP) NO POR A YUDA”, pues bisando cu loke a pasa tawata un accidente. HENDE NO POR IMAGINA SU MES UN ACCIDENTE MAS TRAGICO, pasobra Sayuri y IP tawatin bon amistad cu otro. Nan ta bisiña y Sayuri, manera un ruman muhe grandi di IP sa scual IP ora e laga su cas y cura sushi. Tambe Sayuri sa trece cuminda pa IP, cu tawata bibando su so den e cas. IP tawata e momento ey un menor di edad di 17 aña, cu nunca antes a tira cu un arma.

E tawata un mucha cu a cay den mal influencia di otro muchanan cu si tin mente criminal, y IP tawata bayendo asina den mal caminda. P’esey cera IP den Kia pa 9 aña NO ta un solucion. E mester haya oportunidad pa ser poni den un Institucion pa menornan pa asina nan trata cu ne pa cambia su bida completamente.

Ta hopi claro cu fiscal y hues di Aruba a dicidi di duna 9 aña pasobra e caso di IP a bin dilanti den publicidad como si fuera ta trata di un asesinato cruel intencional y Fiscal y Hues tin miedo di e opinion publico si nan no duna un castigo largo. Pues como cu e sentencia di Hues di Corte di Aruba, pa loke ta e castigo, ta incorrecto y no ta cuadra cu decisionnan den casonan similar, a apela e decision di Hues di Prome instancia.



Dos herido durante di pelea dilanti club nocturno

Algo despues di mey anochi di diahuebs pa diabierna, central di polis a dirigi un patruya cu urgencia pa club Miami den Weststraat caminda lo tin un pelea tumando luga na e sitio. Sinembargo na momento polisnan a yega na e sitio, nan a ripara un auto Honda Civic bandona e sitio den pura pero ni a mira algo straño dilanti di e club.

Polisnan a drenta den e club pero aki tampoco ta mira algo cu no ta bon y ningun hende a acerca e polisnan pa duna informacion riba un of otro pelea y tampoco cu algo lo a

pasa den e club aki.

Na momento cu e oficialnan di polis a bay bek pafo di e luga, nan a wordo acerca pa un homber di inicial H jebde a informa e polisnan cu el a wordo maltrata pa un homber cu e no conoce y el a ricibi un kap na su wenkbrauw robes.

Un rato despues un otro homber di inicial K a acerca e polisnan pa duna keho cu el a wordo maltrata tambe pa un persona cu e no conoce cu un boter kibra y polisnan por a mira cu e tabatin un herida na su man robes y tambe el a wordo golpia cu algo riba su cabes.

Polisnan a tuma nota di e actonan di agresion y a informa central di polis di esaki.

Un detencion despues di haya cinco scooter desmantela

Diahuebs atardi 6.30 central a dirigi un patruya pa Arendsstraat relaciona cu denuncia cu lo tin varios scooter den un mondi banda di tereno di Riverplate na Madiki. Na e sitio polisnan a wordo acerca pa un ciudadano di Arendsstraat kende ta mostra cu e ta cana regularmente den e mondi cu tin dilanti di su cas pa mira si por tin algo cu no ta bon den e matanan y diahuebs el a bin topa cu dos

scooter den e matanan cu probablemente ta procedente di ladroncia of joyriding.

Polisnan a bay tira un bista den e mondi caminda a bin haya, no dos pero cinco diferente scooter totalmente desmantela y mesora a cuminsa saca esakinan for di e mondi pa spera riba pickup di polis pa transporta esakinan pa warda di polis.

DETENCION

Sperando riba transporte policial polisnan dado momento a nota presencia di un hoben den e mondi y a bay pa papia cu e mucha homber aki pa mira kico e ta haciendo den e mondi na e momento ey.

El a splica cu el a bin mira kico e polisnan tabata haciendo cu e scooternan pero e oficialnan a mira e mucha homber pone un cahita oranje riba un mesa na e sitio y e hoben mes a bisa cu den e caha e tabatin un tiki marihuana den e caha.

Ora cu a bay controla den e caha, en berdad a haya un saco di plastic cu yerba berde cu ta mostra riba marihuana y despues di un rato un di e agentenan policial a bin reconoce e hoben aki di tabata meti den un caso di joyriding of ladroncia di un scooter e aña aki, pa cual el a wordo deteni pa investigacion. Mirando cu e hoben a bin tira bista kico polisnan ta haciendo cu e scooternan, a lanta e sospecho cu e lo por ta involvi den caso di ladroncia y bendemento di cos horta y el a ser deteni y transporta pa warda di polis pa mas investigacion. E hoben di inicial R. a wordo transporta pa warda di polis y a ser presenta dilanti di fiscal auxiliar.



Bin bishita nos y probecha!

Paña di bon calidad na bon prijs.

Adres: Avenida Milio J. Croes 47 local 3
Telefon: 5646733 - 5653466
E-mail: info@carlymar.com

Violet Spa

Servicios a Domicilio

- Masajes Anti-Estress y Relajantes
- Masajes Terapéuticos
- Reflexologia Podal
- Detox Lonico

Masaje Reductor

Masajes reductores contiene:

- Aparatologia Combinada
- Manta Térmica
- Maderoterapia
- Drenaje Linfático

Moldeo de Figura

con cierre de costilla y reloj de arena



+297-740-5235



Ubicación bajo demanda



BEAUTY & SPA

Ainda mi no por haya mi condominium cumpra 14 aña pasa

E retrasonan ta sigui pa entrega e apartamentonan di Acqua Condominium (abuso cu ta wordo cometi door di Acqua Condominium unda ta funciona un hotel di e prestigioso cadena Radisson Blu Aruba).

E abusonan ta wordo cometi door di presidente di Acqua, Venancio Gonzalez (desaroyador) y sucesor di e rumannan Marcoli, den e puesto aki. Tur esaki realisa den conhunto cu un trein di abogado cu ta compaña, conseha y protege den tur aspecto legal.

Husticia pronto lo bolbe.

E firmante Jose H. Potenza Perez di 79 aña di edad, casi 14 aña pasa a cumpra e apartamentonan na Acqua cu e ilusion di pasa resto di mi bida entre Aruba y mi pais natal. E sorpresa ta cu a pasa 14 aña y e proyecto ta finalisa pa varios aña caba, y ainda no a entrega y ta sigui e tardansa pa entrega e apartamentonan.

E apartamentonan a wordo cancela cash loke ta nifica cu nan a horta 10 aña di mi bida desde fecha di e supuesto finalisacion y entrega di esaki, uzando e placa pa construi. E tardansa aki ta logra uzando manipulacion y caprichonan supuestamente legal?

E abogado cu tabata cu a comunica cu mi diferente biaha ta Jovanca Frolijk y e no ta duna contesta riba e peticion entrega di loke legalmente ta pertenece na nos. Y ta uza palabranan legal.

Pa entrega e propiedad aki na nos via di Notario, nos mester firma di forma boluntario un addendum. Y si nos no colabora cu e firmanan, nan no ta entrega. E pregunta ta: Esaki ta legal? O e ta un forma sutil di presion pa kita e propiedad for di nos.

Mi ta pidi:

1) Entrega mi sin presion y legalmente, cancelando e gastonan notarial, manera poni den e documentonan di e representante di Acqua 14 aña pasa. Paga mi 5% di interes legal.

2) Kita e propiedad di mi si tin motibonan legal pa uzo di interes publico.

3) Of demanda mi si loke mi a bisa ta un calumnia

Sr Venancia y abogadonan di Acqua. Mi ta laga e tres opcionnan aki pa boso scoge y actua.

Den tur e documento- y audionan graba cu autorisacion, nunca nos kier a uza e caminda huridico, te cu awo cu nos a contracta abogado Carol Helen Lejuez, pa e representa nos den e caso aki.

Mi no ta permiti mas menasa di parti di e abogadonan di Acqua.

Ultimo pregunta n a comunidad di Aruba y tur esnan afecta door di esnan cu ta dirigi Acqua Condominium, Venancio Gonzalez y su bufete di abogado.

Na cual pais di mundo ta permiti cu un compania no ta cumpli cu sentencia firme di un Hues di Aruba y despues confirma y ratifica door di tres hues di Corte Superior di Corsou.

Di ki husticia nos ta papia cu ta legal of ilegal na Aruba. Autoridadnan no sa di esaki? E duda na Aruba ta si ta existi un poder supremo celestial cu ta protege y ampara e companianan aki?

Hunto cu esaki ta manda pa notario cu te cu awendia a maneha y registra varios di e traspasonan realisa door di Acqua Conmdominium. Cu mi sa, e caso gana den Corte no por a wordo registra pa motibo cu mi no a coopera cu e addendum. Mi a compronde cu esnan cu a firma e addendum si a wordo notaria.

Mi ta puntra mi mes si Radisson Blu ora di firma e contracto di operacion pa e edificio Acqua como hotel, Acqua a informa nan cu tin doñonan di apartamentonan kendenan nunca a wordo informa di e negociacion ey y cu ainda no a entrega nan apartamentonan (te cu awo a entrega solamente esnan cu a firma e addendum, pa entrega un parti di nan propiedad), loke nos a nenga di forma. P'esey no a entrega nos e apartamento. Nos a exige pa nan entrega nos esaki segun e contracto a base di cual nos a cumpra y nos ta considera cu cancelacion di nos propiedad si firma esey.

Adrian

Mike de Meza (AVP):

Ceramento di John Wesley College tin impacto riba San Nicolas

Ceramento di John Wesley College lo por tin consecuen-
cianan serio pa calidad di enseñansa. No solamente na
San Nicolas, pero tambe pa enseñansa riba henter Aruba.
Pasobra John Wesley College (JWC) ta un scol conoci pa
bon enseñansa cu a hunga un rol importante den bida di
hopi hoben y pa hopi aña na San Nicolas. No lo ta facil pa
reemplasa e scol aki si cere. Ceramento di JWC lo limita e
posibilidadnan pa studiantenan na San Nicolas y lo por tin
como consecuencia cu e ta pone mas presion riba otro scol-
nan, haci klasnan den otro scolnan mas grandi, exige mas di
nan recursonan limita, cu na su turno lo por tin influencia
negativo riba maestronan y studiantenan. *“Esaki ta loke nos
ta bisa den nos documento pa tene JWC habri. Den paisnan
rond di mundo nos a wak e fenomeno aki sosode, pasobra e
recurso, scol, maestronan y finansa ta keda limita si no cam-
bia e maneho. Y e ta pio ainda pa un area di nos isla cu ya ta
masha limita den tur cos, menos stimacion pa nos pais. No
tin niun parti di nos pais cu a wordo negligia pa tanto aña
door di e gobiernonan di e signatura di MEP, manera San
Nicolas y vecindario”.* Asina Mike de Meza di partido AVP a
splica pakico e ceramento di JWC ta asina malo pa enseñan-
sa y pa San Nicolas.

SEÑAL ROBES

Ceramento di JWC ta manda un señal robes pa studian-
tenan, maestronan y mayornan tocante di e balor di ense-
ñansa. Especialmente den un tempo cu ya ta dificil pa tene
hende y hobennan motiva y cu speransa pa futuro.

Mike de Meza: *“Den e documento cu nos a entrega cu argu-
mentonan pa tene JWC habri y haci pa haci bon uzo di e scol
y e maestronan, nos ta menciona tambe e punto ey. Esta
cu ceramento di e scol ta manda un señal robes pa studi-
antenan. E studiantenan cu ya ta vulnerabel, lo por pensa
cu nan comunidad no ta haya nan enseñansa importante y
p’ese y ta cera e scol. Esaki lo por tin efecto negativo riba
nan estudio. Nos sa cuanto mayornan y maestronan ya tin
cu haci pa tene nan studiantenan motiva. Cera e scol lo haci
e situacion aki pio.”*

SAN NICOLAS Y VECINDARIO

San Nicolas y vecindario ya pa mucho aña ta wordo confronta
cu un serie di problema economico y social. Enbez di tuma
iniciativa pa stimula un desaroyo positivo pa henter e area



di San Nicolas y vecindario, ta dicidi di cera un scol conoci
manera JWC.

Mike de Meza: *“Esaki ta otro sla pa e area aki y e ta limita
e capacidad di San Nicolas y vecindario pa uza enseñansa
como un instrumento pa promove desaroyo. E ta kibra e
speransa pa un miho futuro ainda mas. Bo sa ki efecto nega-
tivo edificionan cera y scolnan cera tin riba hende y riba e
speransa pa cos drecha? Den e documento cu nos a entrega
na gobierno nos ta menciona e efectonan negativo di loke
nan ta yama e “broken window effect”. Nos ta muestra cu
estudionan haci den paisnan rond di mundo ta muestra cu
edificionan y scolnan cera por contribui na mas inseguridad
y criminalidad, pasobra e ta stimula un comportacion anti-
social y ta kibra e sentido di pertenece na comunidad sano.
Ta net door di inverti den enseñansa gobierno lo por contribui
na revitalisa e comunidad y promove un sentido di siguridad,
speransa pa un miho futuro y cu e hendenan ta pertenece na
un comunidad cu ta traha na mehora e comunidad.”*

Mike de Meza ta sigui muestra riba e argumentonan cu nan
a pone den e documento pa tene JWC habri. **Mike de Meza:**
*“For di dia cu a cera e refineria San Nicolas y vecindario a
hay’e confronta cu retonan economico, social y di infrastruc-
tura grandi. E ceramento di un scol ta empeora e situacion
aki pasobra e ta haci e revitalisacion mas dificil y ta kibra
e moral di e comunidad di San Nicolas. Si inverti den San
Nicolas gobierno lo manda un señal positivo cu e ta kere y ta
actua pa lanta San Nicolas atrobe. E mes un señal aki lo tin un
efecto positivo pa henter nos pais cu tambe mester di inver-
sion y stimulacion pa lanta cabes atrobe. Si tene JWC habri
gobierno ta contribui na transforma San Nicolas, atrae mas
inversion, cu lo crea mas oportunidad pa e siguiente gener-
acionnan. AVP si ta kere den tene e scol habri y cuminsa un
proceso di renoba San Nicolas y vecindario.”*

OPINION

Escasez enorme di trahado den construccion y horeca ta un problema grave pa Aruba su Economia

Segun Clyde Harms

Aruba ta sufriendo actualmente un escasez enorme di trahado den diferente sector, specialmente den sector di construccion y den horeca. E bashi di trahado ta un problema grave pa nos economia, sigur afectando nos turismo como tambe desaroyo.

AHATA tin un lista cu centenares di vacatura na e diferente hotelnan miembro di e organisacion. Tin un hotel cu ta spera di habri na San Nicolas aki na dos aña y ya nan ta buscando mas di 600 trahado. E gerente di un hotel a declara cu pa e por sobrevivi, e ta bay cera un cantidad di camber pa e por reduci e necesidad di mas trahado. Su ganashi lo ta hopi menos, pero e huespednan lo no por desgaba e hotel ora nan bay bek na nan pais.

E sector di construccion ta experiencia e mesun situacion. E mes hotel cu ta busca 600 trahado ta buscando mas di 200 trahado pa e construccion. Frecuentemente contratistanan mester nenga oportunidadnan lucrativo pasobra nan no kier compromete nan mes mientras cu nan no ta sigur cu lo tin trahadonan disponibel. Hopi contract di construccion ta posponi pa falta di trahado.

E pregunta cardinal ta, con por yena e bashi aki? Desafortunadamente, no tin suficiente trahado Arubiano pa yena e bashi, pero tin hopi Venezolano cu ya ta riba nos isla como refugiado of cu tin un status di “irregular” cu ta traha ilegal cu lo por yuda.

Remarcabel ta con Gobierno di Aruba ta dispuesto pa duna permiso na inmigrante nobo, pero no kier legaliza e Venezolanonan cu ta riba nos isla caba, dispuesto pa traha pa un mihor vida. Cu e scarsedad enorme di cas pagabel, esaki ta parce mi un politico contra-productivo: Na unda esunnan cu lo bin Aruba ta bay biba? Ta mas logico pa nos uza esnan cu ta riba nos isla caba.

Legalizando e refugiadonan lo ta un acto humanitario cu lo demonstra un bes mas e bondad di nos pueblo y e no ta un acto completamente altruista. Aruba su economia tambe lo beneficia. Drentando e mercado laboral legal, e refugiadonan lo

paga belasting y contribui na AZV.

Nos pueblo di Aruba semper tabata cla pa yuda caminda cu nan por. Despues di Guera Mundial II nos pueblo a yuda Hulanda. Varios organisacion y scol a organisa actividad cultural, deportivo y musical pa recoge placa pa yuda Hulandesnan. E pueblo di Aruba tambe a yuda Venezolanonan na 1999, tempo cu nan a bira victima di e desaster di La Guayra.

Di nan parti, e Venezolanonan tambe a yuda Aruba den diferente manera. Simon Gollo cu e maestro Abreu na 2006 a duna un concierto gratuitamente na Cas di Cultura cu a produci miles di florin pa Aruba Scholarship Foundation. La Cuadra Venezolana algun aña despues tambe a duna un concierto na beneficio di Aruba Scholarship Foundation sin cobra un cen pa nan talento. Tin por lo menos dos Arubiano cu a haci nan estudio universitario na Merca danki na e obra di caridad di e musiconan Venezolano.

Ami mes y mi señora ta disfruta di e trato di mediconan specialisa Venezolano cu definitivamente a hisa e calidad di cuido di salubridad di nos comunidad.

Di 2015 pa 2019 Simon Gollo a organisa e ‘Nuevo Mundo Festival & Academy na Aruba’. Aruba Tourism Authority (ATA) a considera e eventonan aki masha beneficioso pa nos turismo y a honra Simon Gollo pa su decision pa tene e festival na Aruba y no na algun otro isla den Caribe cu tambe tabata anhela di beneficia di tal festival.

Mi ta sigur cu e gentil pueblo di Aruba lo kier yuda e refugiadonan cu a bira victima di e desaster politico cu a forsa 7.5 miyon Venezolano emigra – no, nan a huy di nan propio pais. Gobierno di Aruba, como representante di e pueblo di Aruba, mester trata di yuda caminda cu por.

Un caminda cu por ta pa gobierno implementa e procedura y regulacionnan temporario pa trahadonan cu Departamento di Labor tin cla. Ta parce cu un obstaculo ta e rekisito di algun empleador pa e empleado tin un cuenta bancario caminda e empleador lo deposita su salario, pa no paga cash. Pagamento di salario cash ta duna e empleador mas gasto. Mayoria di e trahadonan aki no tin un cuenta bancario. No pasobra nan no kier, pero pasobra pa habri un cuenta bancario na Aruba ta un caminda di cruz. Hopi rekisito y mas burocracia. E exigencia di algun empleador no mester perhudica tur e otroonan.

Mi ta spera cu nos gobierno lo tuma un decision pronto tocante e problema serio aki pa asina nos por evita, of por lo menos alivia, e peligro serio cu ta menasa nos economia.

Clyde R. Harms:

FFD ta desmenti informacion eroneo den media



Fundacion Facilidadnan Deportivo (FFD) ta un fundacion cu ta wordo subsidia door di gobierno, pues nos empleadonan no ta wordo considera como ambtenaar.

Recientemente nos a tuma nota di informacionnan eroneo cu a wordo publica dia 21 di Juni 2023 den noticiero Enfoke, relaciona cu a tuma un persona di nacionalidad Venezolano den servicio, cual no ta berdad. Fundacion Facilidadnan Deportivo tin su departamento di Recurso Humano cual ta responsabel pa evalua y analisa cualkier solicitud cu drenta. Den e caso aki, tin hopi rekisito cu mester cumpli cun'e prome cu bin na remarke.

FFD ta un fundacion serio, cu ta wordo maneha segun nos statuto ta prescribi. Pues nos ta lamenta acusacionnan sin base y sin prueba cu ta wordo haci den nos direccion.



PASEO HERENCIA

*THE BEST ENTERTAINMENT
IN THE BEST ENVIRONMENT*

- **LATEST RELEASES**
- **RECLINING SEATING**
- **LASER PROJECTION**
- **7.1 DOLBY SOUND**
- **RESERVED SEATING**
- **ONLINE TICKETING**
- **CONCESSION AND DELI**

Empleadonan di La Cabana a keda inspira y motiva durante encuentro general

La Cabana Beach Resort & Casino su encuentro general cu empleadonan a wordo organisa recientemente na e resort. E tabata un encuentro inspirativo y hopi informativo na unda varios topico clave a wordo discuti, generando emocion y un sentido di satisfaccion cerca di empleadonan.

E encuentro a cubri varios asunto importante di e resort su filosofia manera atencion na nos bishitantenan, mehoracion den servicio y presentacion, reconocimiento special na Jessica Franken, Assistant Resort Manager, updates riba renobacion di resort, y introduccion di un punto adicional significativo den loke ta e beneficianan di seguro medico pa empleadonan.

A cuminsa e encuentro cu un enfasis fuerte riba satisfaccion di nos bishitantenan, subrayando e organisacion su compromiso pa brinda servicio excepcional y creando experiencianan memorabel pa nos bishitantenan. E team di maneho a comparti strategianan exitoso y best practices, inspirando empleadonan pa sigui sobresali den loke ta e expectativa di nos bishitantenan.



Un otro topico esencial cu a wordo adresa durante e encuentro tabata e status recien pa loke ta standardnan pa 'grooming' cu e meta pa mantene un apariencia profesional, den liña cu trends actual di e industria.

Un momento bunita di e encuentro tabata e celebracion ora di reconoce Jessica Franken manera ganador di e ARDA Award for Assistant Resort Manager pa 2023. Jessica su logro remarkabel a wordo celebra, asina inspirando y motivando henter e team.

Adicionalmente, a comparti updates cu empleadonan riba e proyectonan di renobacion andando actualmente. E team di maneho a comparti progreso y plannan pa futuro, reflehando nan dedicacion den loke ta mehoracion di e experiencia completo di nos bishitantenan. E empleadonan a expresa di ta contento di ta parti di un trayecto transformativo, contribuyendo na un atmosfera vibrante y positivo durante e encuentro.

E encuentro a conclui cu anuncio di un cambio den e beneficianan medico di empleadonan, na unda cu e team di recursonan humano a revela detaye di un paquete amplia cu beneficianan. Esaki ta inclui mehoracion den e cubrimiento y servicicionan adicional. E anuncio aki a wordo ricibi cu hopi aprecio y gratitud, reflehando e organisacion su compromiso pa e bienestar di su empleadonan.

Esaki tabata un evento hopi interactivo y cu sigur a stimula hopi aspiracion. E empleadonan a sali for di e encuentro sintiendo nan mes bon informa, motiva, y aprecia, cla pa sigui contribui na e organisacion su exito continuo.

GANAR UN

DIGICEL DL4

5.5 Inch IPS Display

Like and Share
Nos Facebook Page

Tag bo friends den e
comments

Haya chens pa gana

Ganador lo wordo nombra dia 30 di juni riba nos Facebook Page






LIKE & SHARE

www.awemainta.com

[f/AWEMainta](https://www.facebook.com/AWEMainta)

Mayornan awo por cambia nan yiu di scol y aplica na un scol di SKOA

SKOA ta anuncia cu a habri su aplicacion pa mayornan cu ta interesa pa cambia nan yiu(nan) di scol cu no ta resorta bou di SKOA pa e proximo aña escolar. Den luna di juni te cu mita di juli mayornan tin e oportunidad pa por haci aplicacion y inscribi nan yiu na un scol cu ta resorta bou di SKOA.

Kico bo tin cu haci pa cambia di scol?

Pa cambia oficialmente di scol y aplica na SKOA mester haci esaki oficial via un formulario. Mayornan por pasa busca e formulario aki na oficina di SKOA y yena esaki completo cu tur documentonan rekeri. Tambe por download e formulario via nos website www.skoa.aw y yena esaki pa entrega na oficina di SKOA. Por entrega e formulario aki dia 10, 11 of 12 di juli 2023.

Documentonan necesario pa haci e cambio di scol pa e mucha:

- Ultimo rapport di scol (aña escolar 2022/2023)
- Uittreksel bevolkingsregister (papel di Censo)
- Copia di AZV-kaart
- Carta di Motivacion pa e cambio di scol
- Certificado di Bautismo (si ta aplica)

KICO MESTER PA APLICA?

- ✓ Ultimo rapport di scol
- ✓ Papel di Censo 5,-
- ✓ Copia di AZV-kaart
- ✓ Carta di Motivacion
- ✓ Certificado di Bautismo

PA MAS INFORMACION

- ☎ (297) 523 1800
- ✉ aplicacion@skoaa.aw
- 🌐 www.skoa.aw

Despues di entrega e formulario pa cambio di scol lo ricibi un respuesta di SKOA na final di luna di Juli.

Dicon scoge pa un scol di SKOA?

SKOA ta e organisacion di educacion mas grandi na Aruba cu ta ofrece educacion di calidad halto. SKOA tin un curiculo completo cu ta enfoca ariba e desaroyo y crecimiento general di cada alumno y estudiante. SKOA ta enfatisa su balornan Catolico, comunicacion na nivel multilingual, diversidad y inclusion, innovacion y tambe actividadnan extra-curricular. Como mayor bo por ta segura cu bo yiu(nan) lo ricibi un educacion completo na SKOA. Si bo kier pa bo yiu experiencia un forma diferente pa siña y descubri su potencial aplica na SKOA.

Pa haya mas informacion di tur e scolnan cu ta resorta bou di SKOA por bishita nos website www.skoa.aw. Por haci pregunta tocante cambio di scol via e-mail na aplicacion@skoaa.aw. Pa contact nos directo por yama nos na (+297) 523 1800 durante orario di oficina.

APPAREL

BOAT ACCESSORIES

TODOMAR

f TodomarAruba @TodomarAruba TodomarAruba +297 585 0555

FISHING TACKLE

FIBERGLASS PRODUCTS

Minister Geoffrey Wever:

Modelo macro-económico MARUBA ta un instrumento importante pa maneho

Riba 22 di juni, Minister Geoffrey Wever, a ricibi un presentacion di Departamento di Asuntonan Economico, Comercio y Industria (DEACI) riba e modelo MARUBA. MARUBA ta e modelo macroeconomico cu Gobierno di Aruba ta uza pa haci entre otro proyeccionnan riba con economia di Aruba lo desaroya y tambe por wordo uza pa simula e impacto macro-económico di maneho.

E modelo MARUBA ta basa riba e Cuentanan Anual di pais Aruba. Cifranan ta ser colecta y publica pa CBS cual ta refleha e funcionamiento di e economia di Aruba. DEACI ta encarga cu maneho di e modelo MARUBA. E Comision Macro Model ta den dialogo continuo cu diferente instancianan y expertonan local, y a base di intercambio di informacion ta haci analisis di diferente desaroyo y asina produci e “Economic Outlook 2022 - 2023”.

“Economic Outlook 2022- 2023” ta e proyeccion economico cu ta wordo uza den e presupuesto di pais Aruba. MARUBA ta un instrumento esencial den esaki. E uzo di MARUBA ta posibel danki na e bon cooperacion entre stakeholders y disponibilidad di data. Data riba diferente area economico manera turismo, consumo, y inversion ta di sumo impor-



tancia pa facilita e uzo di MARUBA.

“E presentacion riba uzo y funcionamiento di MARUBA, un instrumento di maneho esencial pa Pais Aruba, tabata importante y ta musta e necesidad pa tin acceso continuo na data pa asina analisa y monitor nos desaroyo economico den cooperacion cu nos partnernan”, segun minister Geoffrey Wever, kende ta gradici directora Maria Dijkhoff- Pita, drs. Judesca Briceño y drs. Jason Lejuez di DEACI pa e presentacion y e trabao diario pa mantene nos informa di desaroyonan macroeconomico, a traves di e modelo MARUBA.

E publicacion Economic Outlook 2022- 2023 ta disponibel riba e website www.deaci.aw

Graduacion di Colegio Santa Filomena 2023

Den Renaissance Convention Center a tuma luga e graduacion di e alumnonan di zesde klas di Colegio Santa Filomena na San Nicolas. E anochi, cu e tema “The Oscars”, tawata bunita y anima pa meneer Addonsito Croes. Cada alumno a ricibi como regalo, apart di nan certificado, un trofeo color di oro simbolizando e trofeo di premio Oscars. Despues di a saboria un dushi plato di hotel, e alumnonan di klas 6A a presenta nan cancion- y bailenan pa e publico. Na nomber di e team di Colegio Santa Filomena, cabesante Mario Nooijen y maestro Richard Schut a gradici cada mayor y alumno deseando nan tur exito di mundo na scol secundario.



Diasabra 24 juni

Yoga gratis pa comunidad



Bin celebra Dia Internacional di Yoga na Eagle Beach mañan, diasabra 24 di Juni 2023 di 5.30 pa 6.30 di atardi, y ser conoci cu e practica bunita di yoga y meditacion den diferente estilo. 11 instructornan di yoga di Aruba ta uni pa crea un evento bunita gratis pa comunidad.

Durante e evento lo tin diferente les gratis den diferente estilo di yoga y meditacion pa purba. Participantenan por scoge cua categoria nan kier participa. Pa reserva por manda nos un mensahe na 6618133 cu e number(nan) di participante y e number di e categoria cu ta desea di participa. Tur e lesnan lo tuma luga mes momento dus por kies solamente un les pa persona.

Categorianan;

1. Maria Pucci & Marcelle Meijs: Vinyasa /Yinyasa Yoga
2. Nathalie Vriesde & Maria Jose: Chakra Flow / Kundalini Yoga
3. Carina Wever & Leontine Merkies: Deep relax gentle yoga
4. Victoria - Power Yoga Español
5. Martha Echeverry - Senior Yoga
6. Marlon Moore - Kids Yoga 6-11 yrs
7. Brahma Kumaris & Shanti - Meditation
8. Sofie Slegers - Tao Yin Yoga

Ora di inscribi ta haya e location exacto.

Nos ta contento pa por ricibi boso mañan na Eagle Beach.

E version final di Revista Asertivo

Ta trata e tema diCodigo di Proteccion den practica cerca nos profesionalnan di diferente instancia

Parti di e fondonan cu Departamento di Mucha y Hoben (DMH) a ricibi di Union Europeo su proyecto #ACT4ECC (Awareness Campaign Toolkit For European and Caribbean Children), bou supervision y asesramento di UNICEF NL, tabata tambe pa crea un revista digital conhuntamente cu Augeo Foundation, pa engrandece conscientisacion y tin intercambio di conocimiento di e profesionalnan cu ta traha directo y indirecto cu (sospecho di) abuso di mucha. Manera indica, e contenido di revista tabata acumula den e mesun periodo cu e Toolkit, no mas a inicia cu e trabounan specifico di e revista den luna di november 2022. E revista Asertivo, lo ta den dos idioma disponibel, esta Papiamento y Ingles.

Revista Asertivo

E revista digital, cu ta carga e number: Asertivo, ta encera 8 tema pa crea conscientisacion, comparti conocimiento, experticio y experiencia den veld, como anexo riba e toolkit y tambe pa ilustra e aspecto positivo di tur e trabounan cu e profesionalnan ta haci den combatimento contra abuso di mucha y brinda tur herment di conocimiento y habilidad, cu ta necesario pa traha efectivamente riba proteccion y seguridad pa mucha.

E palabra asertivo a bin masha hopi mes dilanti dentro di e encuentronan como tambe den e entrevistanan mes. Asertivo ta e habilidad/capacidad cu e profesionalnan, e muchanan y comunidad mester desaroya pa papia pa nos na un manera honesto y respetuoso. Tur dia nos ta encontra cu e situacionnan, unda cu si nos ta asertivo por yuda nos, manera puntra un hende tocante dato, acerca un profesional cu un pregunta of duna compliment pa ta haci un bon trabou.

Ta asertivo ta un habilidad di comunicacion central cu por yuda bo na expresa na un manera efectivo y na mesun momento, defende bo punto di bista. Tambe e por yuda bo haci esaki respetando e derechonan y e creencianan di otro. Mester bisa cu e entrevistanan tabata na encargo di sra. Dilma Geerman, mientras como fotografo, tabatin Darlin Quiroz, di Stellar Takes, cu tabata responsabel pa saca tur e potretnan di e profesionalnan den e revista, unda a haci uzo di diferente area di Universidad di Aruba pa gran mayoria di e shooting.

E traduccion di e revista den idioma Papiamento ta den man di sra. Candy Dirkz y netamente e parti aki a tambe a keda cla. Pues awor e revista ta bezig den su fase final, pa pronto durante un lansamento oficial, tur profesional y comunidad, por tin acceso na e contenido di revista Asertivo.

Tradicion di Dera Gay ta basa riba practica cultural pero no uno cu ta afecta nos naturalesa y medio ambiente

Directie Natuur en Milieu (DNM) ta desea pueblo un Feliz dia di Dera Gay y kier avisa pueblo pa celebra conscientemente cu amor pa tradicion, respetando naturalesa y medio ambiente. Nos kier elabora un poco di e historia y e practica di kimamento. Ta di menciona cu nos antepasadonan manera e indjannan di Mexico y Venezuela a bini Aruba y a trece hopi practicanan di agricultura.

Tambe nan a trece nan tradicionnan y custumbenan di cual nos a carga y incorpora manera cultura local. E tradicion di Dera Gay mes ta uno cu a bini di celebracion di agricultura, ora cu tawata tin un cosecha exitoso. Un cosecha exitoso ta trece cu ne cu despues di esaki tin restonan cu no lo uza y ta kima nan den forma di un celebracion. Despues, ta bruha e tera cu e sas cu a keda den e suelo pa e siguiente cosecha.

Awendia nos ta yama locual cu ta resta sushi y hopi otro productonan cu nos no ta uza mas tambe nos ta yama sushi. Como cu a keda practica e parti di kima restonan, hendenan a incorpora locual nan no ta uza tambe como sushi y consecuentemente a cuminsa kima tur cos (esaki kier men e sushi di cosecha y e sushi cu no a bini di cosecha) hunto. E desaroyo aki a trece cune e problematica di kimamento na gran escala y sin control riba e dia di Dera Gay.

DNM ta desea cu nos hendenan por wak atras riba un practica cu no solamente tawata algo spiritual-cultural, pero tambe tawata practica caba di e tempo ey, economia circular cu ta basa riba solucionnan pa e naturalesa.

Tradicionalmente maneho moderno di e ecosistema a bin ta desaroya for di e punto di bista científico y di conservacion. Esaki tin ora a trece conflicto entre cultura y conservacion. Recientemente a bin un reconocimiento cu por logra un maneho eficiente di e ecosistema si tin un bon compromiso y integracion di e relacionnan entre comunidad y naturalesa.

E reto pa maneho di e ecosistema basa riba solucionnan di naturalesa ta cu e ambiente global semper ta cambia y algun di e practicanan di antes por conduci na degradacion di ecosistemanan. Por ehempel, door di kima, esaki ta afecta medio ambiente y ta resulta den cambio di clima acelera.

E solucion por ta sinta den un maneho integral di ecosistemanan, cu ta inclui e rol di cultura pa asina alcanza e demandanan di naturalesa, y hende p'asina trata e cambionan global y maneha mihor e ecosistema y bienestar di



hende. Por logra esaki door di promove conservacion di biodiversidad pero tambe logra esaki door di yuda comunidad compronde cu un mal custumber por trece impactonan negativo cune.

Cultura of tradicion di Dera Gay y e asunto di kimamento no kiermen cu nos ta actua contra ley of causa daño na nos salud, e naturalesa y medio ambiente.

Pa e motibo aki DNM kier avisa pueblo tambe pa pone atencion na e siguiente puntonan:

Ta prohibi pa cende candela riba caminda publico. Esaki ta prescribi den articulo 14 di e ordenansa di polis (APV). Segun articulo 8 di APV, ta prohibi pa causa molester na bisiña por ehempel door di cende candela y kima.

Pone atencion na unda ta cende candela. Tin tereno di naturalesa cu ta protegi pa ley y ta prohibi pa cende candela den e areanan aki. Manera Spaans Lagoen, Parke Nacional Arikok, y nos areanan di parke marino.

E motibo pa esaki ta cu e candela por causa daño y perdida di na nos flora y fauna, por ehempel matanan di mangel, otro matanan di balor, parhanan, cangreunan y otro sortonan.

Ban celebra e dia di Dera Gay 2023 na un manera responsabel y reduci e impacto cu kimamento tin pa nos naturalesa, medio ambiente y salud. Esaki ta e mihor deseo di DNM.

36 luna castigo di prizon demanda pa Venezolano cu a mishi cu menor di edad

WILLEMSTAD - Na luna di maart ultimo hues mr. J. Snitker a confia pa laga e homber Venezolano Yordanis Domingo Martinez Cordero di 37 aña di edad bay cas numa, pendiente di tratamento di su caso diaranson ultimo.

E homber aki ta acusa di a abusa sexualmente di e nieta di e muhe cu e tabata biba cune. Esaki a sosode, durante e periodo november 2020 pa mei 2021. Ampliamente e dagvaard ta describi e actonan sexual immoral cu el a comete cu e mucha di 10 aña di edad. Tambe el a laga e mucha mira pelculanan di pornografia di adultonan cu ta haci sex y te hasta masturbacion.

Pa tratamento e caso a bini varios biaha den sala di corte y por ultimo tabata 8 di maart, pero cada biaha tabata falta un of mas detaye pa caba di atende e asunto aki. Tabata abogado mr. B. Lie Atjam, kende a insisti pa laga e acusado aki den libertad, pendiente tratamento di su caso diaranson ultimo. Normalmente mester a laga e acusado Yordanis Domingo Martinez Cordero warda tratamento di su caso den prizon, den e departamento pa ciudadanonan indocumenta na Corsou, pero esey no a sosode. Como tal por anticipa cu e sospechoso aki, una bes den libertad, lo no presenta den sala di corte, es decir cu e para aki lo bula bay. Ta precies loke a sosode, pasobra diaranson ultimo el a briya pa su ausencia.

Abogado mr. Lie Atjam a declara di a topa cu e acusado na snack y esey tabata rason pa hues sigui puntra e abogado pa cua motibo e acusado no a presenta pa su caso den corte. E sucesonan aki di abuso sexual a bin sali na claridad despues cu e mucha



a comparti su experiencia na scol, bisando cu e tin relacion cu e homber Venezolano pa mas di 1 aña caba y cu tur cos a cuminsa cu sunchimento, pero cu esaki a desborda den relacionnan intimo. E wela a bin sa y a pone autoridadnan na altura cu a start e investigacion.

Den sala di corte e homber mester a bin responsabilisa imagennan di filmacionnan riba su telefon, potretnan cu el a saca etcetera. Pero e homber a sigui insisti di ta totalmente inocente y hasta a bisa cu durante e periodo cu a bisa di a comete e actonan ey, e tabata den exterior. Tambe el a declara di lo no kier hay'e cu husticia pasobra e ta hopi consciente di ta indocumenta na Corsou, como tal e ta core riesgo di

keda deporta, loke e no kier.

E mucha sinembargo a mostra cu e homber Venezolano tabata mishi cune principalmente ora cu e wela no t'ey y esey a ocasiona cu asina cu e wela a bin sa di e comportacion for di ordo di e homber el a kibra tur relacion cu e acusado Yordanis Domingo Martinez Cordero. Fiscal señora mr. Monique Dennaoui-Simon a splica cu enfasis cu si e homber aki realmente tabata inocente lo el a soru pa ta presente den sala di corte, pero consciente di su culpabilidad el a keda sin presenta na tratamento di su caso. Fiscal repasando tur e argumentonan, a demanda un castigo di prizon di 36 luna y hues mr. Snitker a keda di dicta sentencia aki 3 siman, esta 16 di juli.

Fortaleza pa Famia

Cristo Hesus ta nos unico fundeshi berdadero, tur otro fundeshi ta falso

*** **LAGA** nos bati alarma pa tur hende sa, cu Cristo Hesus ta nos unico fundeshi berdadero.

*** Cristo Hesus ta E caminda di berdad y bida, cielo y tera lo pasa ma Su palabra lo no pasa.

Evita di asocia bo mes cu organisacion caminda bo sa cu Su nomber no ta wordo aprecia, caminda bo sa cu Su palabra y Su berdad no ta wordo reconece. Tene bon cuenta, pasobra tipo di organisacion asina, ta hiba hende na rechaso di Dios. E ta tristo pa bisa pero hopi hende ta bay tras di material y posicion y asina cay for di e caminda berdadero, pasobra Cristo Hesus ta e unico mediador entre Dios y hende.

Ningun hende no por salba ningun hende, ningun hende no por para den luga di Dios, pa bo bida.

*** E cobertura di mas grandi cu hende por tin ta Cristo Hesus como cabes riba tur cos (Filipensenan 2:9-11) .

*** E Sanger di Cristo cu ta laba nos tur for di pica y inhusticia (1 Juan 1:9).

*** Y e Spirito Santo di Dios cual lo siña nos tur cos y hiba nos den e presencia di Dios (Juan 14:15-21).

*** Ban pone tur cos terenal y temporal un banda y gara na locual ta puro y berdadero y eterno.

Apostol Pablo a bisa den 1 Corintionan 3:10-11). Segun e gracia di Dios cu a wordo duna na mi, mi a pone un fundeshi manera un arkitecto sabi, y un otro a traha riba dje,

Pasobra ningun hende no por pone otro fundeshi, cu ta esun cu ta poni caba, cual ta Hesus Cristo.

Ma awor den Cristo Hesus, boso kendenan antes tabata leu a wordo treci cerca pa medio di e Sanger di Cristo (Efesionan 2:13).

Tin hopi organisacion cu ta lantando rond mundo y ta busca pa recluta mas mucha posibel, pa dañá nan mente y nan curason. Treciendo famianan na peliger, pasobra hopi hende ta pensa cu solamente bom nuclear y malesanan por haci daño. Pero diabel tin su agentenan, bon scondi den poblacion, cu ta papia bunita cu hubentud, pero otro banda nan ta supla candela di fierno riba e muchanan, y asina nan ta lanta rechasando Dios, su mandamento y principionan.

Ya na cierto parti di mundo ta pasando leynan cu muchanan no tin mester di autorisacion di mayor, cu nan por actua riba nan mes y tuma nan mes decision.

Bayendo contrali na e palabra di Dios cu ta bisa den Efesionan 6:1-4 kico un mucha y su mayornan mester haci pa agrada Dios.

Señor ta mi baranca, y mi forti, y mi libertador, mi Dios, mi baranca, den kende mi ta tuma refugio, mi escudo y e cacho di mi salvacion. mi toren halto (Salmo 18:2).

Nos tin di para keto un rato y pensa y reflexiona den ki direccion, nos kier pa nos yiunan bay, y para firme contra tur bagamunderia cu ta purba tur dia mas y mas di distancia nos yiunan for di Dios. Tur mayor responsabel ta traha duro pa cria nan yiunan, esey ta deber sagrado di tur mayor. Pero como mayor nos tur ta yama pa no negligisha, disciplina, coreccion y un bida spiritual adecua pa nos yiunan.

Obediencia na Dios mester por wordo mira door di nos yiunan, den cas, pasobra mayornan mester expresa obediencia na Dios, na prome luga, pa asina nan ta berdadero mentor di nan yiu.

Nos ta den un situacion serio caminda nos mester demostra cu pensamento, hecho y actitud, cu Cristo Hesus ta nos unico fundeshi, tur otro fundeshi di idolatria ta falso.

Sinceramente Pastor Marcel Balootje

Minister di Cultura Xiomara Maduro:

Aruba a perde un gran baluarte musico, den persona di Felix (Chucho) Hoek

E siman aki Aruba a wordo conmovi cu un noticia tristo cu un otro gran baluarte musico a bay laga nos, sr. Felix R. Hoek, miho conoci como 'Chucho', kende a nace riba 7 di januari 1962 y a fayece dia 20 di juni ultimo.

Chucho tin un formacion academico riba tereno di musica y a logra su Bachelor den musica profesional na Berklee College of Music na 1986. Chucho tabata docente di guitarra clasico/electrico, baho y lesnan di teoria di harmonia, areglo y solfeo na Stichting Arubaanse Muziekschool/Scol di Musica Rufo Wever pa 9 aña. Despues el a asumi e rol di director te na su fayecimento. Como musico, Chucho a dirigi y acompaña diferente bandanan musical den hotel y comercial. Ademá, Chucho tin un lista extensivo di obranan composita y aregla pa varios cantante, banda, festival, competencia y actividadnan musical. Tambe, Chucho a compone y aregla jingle pa radio y television. Chucho a para hurado na diferente festival- y competencianan

den exterior, a presenta cu bandanan den exterior y sin kita afo: e tabata integrante di diferente banda musical na Aruba. Chucho Hoek su contribucion na Aruba su cultura y formacion musical di generacionnan hoben atraves di su talento y conocimiento musical ta uno grandi.

Aña pasa na november riba Dia internacional di Musica na honor di Santa Cecilia, patrona di tur musico, Minister Maduro a reconoce sr. Chucho Hoek como un baluarte musical di nos Pais Aruba. Debi na kebrante di salud Chucho no por tabata presente, pero digitalmente por a sigui su reconocimiento y e aprecio cu a wordo expresa pa tur su obranan maestral. Obranan cu a toca, inspira y a contribui na enrikece nos herencia cultural musical. E reconocimiento tabata bisa, "Danki pa e añanan dedica na enrikece cultura di nos Pais Aruba pa medio di bo talento y creatividad musical". Ademá Minister Maduro a gradici Chucho pa tabata un digno embaador di nos dushi idioma Papiamentu.



Minister Maduro den nomber di Gobierno di Aruba ta expresa palabra di condolencia y forza na sra. Gina, su yiu y demas famia.

Tambe palabranan di forza pa su coleganan musico den e dianan dificil aki. Masha danki 'Chucho' pa bo gran contribucion na Aruba su cultura musical y pa tur loke bo a laga atras como bon ehempel pa nos hobennan.

Na memoria di Felix "Chucho" Hoek

Pa: Addonsito Croes

E ta e creador di hitnan grandi manera "ay, esta dushi", "mi rehen", "trata-mi bon" di Tsunami cu Sashah Figueroa y tambe "mi mitad pa eternidad", "gosadera", "for di un distancia" y "yen di energia" di Edjean Semeleer entre otro. Un musico, amigo respeta y stima pa tur artista cu a traha cu ne. Despues cu nos amigo Ruben Trapenberg (dfm), cu tawata e MC principal di e concierto anual y clasico di "Scol di Musica Rufo Wever" a bay sosega, Chucho Hoek y Gina Werleman a confia ami pa carga e concierto enorme aki e ultimo 5 añanan. Tawata un honor inmenso di a fungi como e MC principal di e con-

ciertonan di nivel Global di "Scol di musica Rufo Wever". Danki, CHUCHO HOEK p'e invitacion, aprobacion, confiansa y cariño pa cu mi talento. E director cu profesionalmente sa con pa deal cu un MC, cu no ta acepta un programa of draaiboek slordig of pura pura hinca den otro. Den e programanan cu e tawata hinca den otro, cada estudiante y maestro di musica tawata ricibi e atencion cu e merec'e.

Cu e articulo aki, mi ta desea famia henter, amigonan, tur artista, Scol di Musica Rufo Wever y tur cu a stim'e, hopi forza. Den tur futuro concierto di Scol di Musica Rufo



Wever, su recuerdo lo ta cu nos y tambe su cancionnan clasico produci den su bida, lo keda resona den bos di Aruba su artistanan clasico. Cu Chucho sosega trankil.



Pero esnan cu confia den señor lo haya forsa renoba,
ma lo bula bay ariba cu hala manera Aguila.
Nan ta cana sin cansa, nan ta cana sin perde rosea.
- Isaías 40: 31

Cu dolor na nos curason nos ta participa fayecimento
di nos ser stima:

Ana B. Calderon Mendez

Cariñosamente yama "Anin"
*14-12-1969 - †21-06-2023

Na number di su:

Mama: Carmen Mendez

Tata: † Marco Calderon

Yiu: Dana Paola Calderon

Rumannan:

Josefina Calderon

Darwin Escobar

Rumannan di criansa:

Raísa Perreira

Anadircia van Schie

Carmen Mendez

Catharine Hernandez

Gabriel Mendez

Altigracia Amparo

Cristina Mendez

Morena

Ferrer Alvarez

Omo y tanta:

Famia na Colombia

Famia na Republica Dominicana

Juana Mendez

Maldonado de los Santos

Sobrino(a)nan:

Asly Cabrera, Ana Luisa Ceballos, Raiden Roan
Ceballos, Alejandra Perreira, Sheymark Monticeux,
Lía Escobar, Mía Escobar, Shemar Monticeux,
Luis Andres Mendez, Johnferrier Alvarez, Anueri
Gonzalez, Naíma van Schie, Maxwell van Schie

Primo(a)nan:

Famia Escobar

Famia nan na Republica Dominicana

Ta invita pa acto di entierro cual lo tuma lugar na
Aurora Funeral home **diamars 27 di juni 2023** di 2'or
pa 4'or di atardi. Despues lo sali pa Santana Central
Sabana Basora.

Condolencia lo tuma lugar na Aurora Funeral Home
dialuna 26 di juni 2023. Di 7'or pa 9'or di anochi.

Disculpa nos si den nos tristesa nos por a lubida
algun famia of conocir.



Gradicimento y Invitacion

Un danki di curason na tur famia, bisiñanan,
amigonan y conocirnan
cu di un manera of otro a duna sosten,
amor y cariño durante bida, fayecimento y
despedida di nos Omo Foy

Florito Paesch

Mihor conoci como: "Foy"

Invitacion pa un Santpo Sacrificio na misa Santa
Filomena na Paradera diahuebs 29 di juni 2023 pa
7:00 pm



Laga tur loke ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras keda bunita y
Laga esakinan termina den tur buniteza.
Cado Wever.

Cu inmenso tristeza nos ta anuncia fayecimento di:

Luis Esteban Geerman

Mihor conoci como
"Luchi, Lucho, omo Lucho"
*26-12-1963- +18-06-2023

Na number di su:

Mayor nan:

†Leoncio "Joonchi"

†Enriqueta "Riketa" Geerman

Esposa: Jennely E. Geerman-Britten

Suegra y suegro:

† Reinaldo "Nadi"

† Marcela "Chela" Britten-Webb

Yiunan:

Raymond Geerman y Andrea Estrada Sánchez

Jeumar y Betsimar Geerman Avila Ojeda

Janella Geerman y Jeancarl Franken

Manera su yiu nan:

Harold Gibbs

Mireya Wernet

Nieto: Christian Geerman

Nieto sin dolor: Matthew Wernet

Rumannan:

† Felix (Milo) Geerman y famia y

Rhona Geerman-Dabian.

† Jacobo y † Selpha Geerman-Croes famia

Lucia y Roly Croeze y famia

† Maria Salome Geerman

Pedro y Linda Geerman de Fino y famia

† Henry Geerman y famia

† Rubeta y † Jossy Quandus y famia

† Sita y † Jani Maduro y famia

Carlo Geerman

Avilia y Ronny Ridderstaat y famia

Christina Geerman

Swa y cuñanan:

† Constatino y Rosita Britten- de Cuba y famia

Wilfrido y Solimar Britten-Velasco y famia

Omirma Britten y Johnny Schmidt y famia

† Reinaldo Britten y yiu nan

Dylia y Junior Panneflek y famia

Tanta y omo nan:

Jacinta Geerman y famia, Juan Maduro y famia,

Chichi Tromp-Rasmijn y famia, Maiky Rasmijn y famia,

Dianna Nicolaas-Rasmijn y famia.

Ihanan:

Gianny Maduro, Richella Orman, Derick Britten,

Frideska Britten

Amigo nan di cas: Richard Kelly y famia, Rubencito
Boekhoudt y famia, Roger Pimentel y famia, Alberto
Avila Ojeda y famia, Richard da Silva y famia, Alberto
Groeneveld, Nena Vallarino Molina


Primo stima: Albert "Al" Maduro y famia.

Tanta y omonan, Sobrina (o) nan, prima(o) nan,
comer y comper nan. amiga (o) nan, colega nan di
Biblioteca Nacional Aruba y demas famia Geerman,
Britten, Maduro, Ridderstaat, Tromp, Nicolaas, Rasmijn,
Quandus, Croeze, Damian, de Fino, Croes, Angela,
Panneflek, Schmidt, Webb, Boekhoudt, Everon,
Flemming, Pontilius, Wolff, Wernet, Farro, Rojer.

Si den nos tristesa nos por a lubida un of mas famia nos
disculpa.

Condolencia lo tuma lugar na Aurora Funeral Home
Diasabra 24 di juni 2023 di 7'or pa 9'or dia nochi.

Ta invita pa acto di entierro cual lo tuma lugar na Misa
Sta. Filomena Paradera **Dialuna 26 di juni 2023** di
2'or pa 4'or di atardi y despues lo sali pa Santana
Catolico na Paradera



Senior ta mi Wardador,
mi n' tin falta di nada,
den kunuku di yerba Bèdè
E ta pone mi sosegá
E ta hiba mi na awa frankil, pa mi bolbe haña
forsa.

Cu Honda Pena, Pero Gradecido pa tur Locual e
la significa pa nos,
Nos ta anuncia Fayecimento di

Sra. Viuda Thomasina Theodora Limonier-Croes

Na un Bunita Edad 91 Anja
"Mama China, Ma China of Doedoe"
*1 April 1932 - †16 June 2023

Na number di

Su Mayornan: † Porfilio y † Lucia Croes

Esposu: † Hildo Limonier

Yiunan:

Mario "Mai" Limonier y Glenda Limonier Dijkhoff

Viudo Francisco "Frans" Limonier

Frida Orman Limonier y Clyde Orman

Edwin "Eddy" Limonier y Wendy Boutier

Florencia "Mary" Limonier

Manera yui: Esther "Tette" Dirksz y Famia

Nieto y Nietanan:

Jolitza Limonier

Marion y Judmira Limonier

Janine Limonier y Robert Tromp

Norman Orman y Yeniree Penja

Hildomar Limonier y Rishelline Slagt

Windy Joung y Shandra Vrolijk

Glenmar Limonier

Jamyson Limonier y Jaim Tobing

Randy Joung

Jermain Limonier y Kaylee van Dongen

Su Bisanieto y Bisanietanan:

Kayley Wernet, Dayomar Limonier, Jayron Tromp,

Nayira Orman, Dayler Limonier, Naomar Limonier,

Nayree Orman, Naylie Orman, Yasira Acta.

Mama di su Bisanieto nan, Dajana Semeleer

Tur su Ruman nan den Feliz Memoria

Su Cuñanan:

Viuda Norma Croes y Famia

Antonia y Santiago Erasmus y Famia

Su Subrina y Subrino nan, Prima y Primo nan,
Comer y Comper nan y su Iha nan.

Famianan:

Croes, Limonier, Dijkhoff, De Cuba, Orman,

Boutier, Joung, Quandus, Vrolijk, Hernandez,

Loopstok, Kelly, Alias, Lampe, Hazel, Figaroa,

Willems, Dammers, Daal, Herms, Fingal, Wever,

Kock, Tromp, Dirksz, van der Biezen.

Ta invita demas famia, tur amigo, bisiña,
conocirnan, pa acto di Despedida cual lo
tuma lugar **diamars dia 27 di juni 2023** na Aurora
Funeral Home, di 9:00 am pa 11:00 am

Acto di Cremashon lo tuma lugar den Seno
Familiar.

Nos disculpa si den nos momento di tristesa nos
por a lubida un ser keri. Nos ta lamenta di no por
ricibi bishita di Condolencia na Cas.

Enbes di flor of krans lo tin un box di donacion pa
Cas di Machi




The LORD is my shepherd; I shall not want.
2 He makes me lie down in green pastures.
He leads me beside still waters.
3 He restores my soul.
He leads me in paths of righteousness
for his name's sake.
With deep sorrow we announce
the passing of our beloved:

Navilia Rufinay Adolfo

*10-07-1926 †21-06-2023

Date and place of funeral will be announced later



"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa". - Salmo: 23

Nos ta anuncia fayecimento di:

Jahaira M.J. Webb-Rasmijn

Mihor conoci como: "Jaja"
*26-12-1983 - †18-06-2023

Acto di despedida lo wordo anuncia despues.



"Señor ta mi wardador, mi'n tin falta di nada.
Den cunucu di yerba berde e ta ponemi sosega.
E ta hibami na awa trankil,
pa mi bolbe haña forsa". - Salmo: 23

Ta participa fayecimento di:

Marie D. Cezaire-Joicin

*26-05-1957 - † 06-06-2023

Acto di entiero lo wordo anuncia despues



Gradicimento

Pa medio di esaki famia kier a gradici tur esnan
cu na un manera of otro a duna nos sosten, consuelo y
forsa durante e tempo dificil cu e fayecimento y entiero
di nos defunto stima:

**Akkelina Elizabeth
Bernabela-Zievinger**

*26-09-1962 - †18-06-2023

Según deseonan di nos defunto stima,
entieru a tuma lugar diahuebs 22 di juni 2023.
Un danki na personal di Horacio Oduber Hospital piso
4 A&B, na Dr. Joaquin van Trigt, Terapista Marlon y staff
di Wilhelmina kanker Fonds. Boso muestra di atenshon
tabata un gran consuelo pa nos.



"Mi Dios, mi señor, mi salvador
Cu bo amor infinito tene mi den bo brasa
Ya no tin scuridad
Unicamente bo luz briyando."

Cu inmenso dolor na nos curason nos ta
anuncia fayecimento di:

**Felix Raimond
'Chucho' Hoek**

*07-01-1962 – †20-06-2023

Na number di su:

Esposa:
Gina Hoek-Werleman

Mescos cu yiu:
Gianno, Jené y yunan
Giannina

Yiu:
Nigel Hoek y Irza

Nieta: Shardia

Tata: †Teofilo Hoek

Mama: Carmen Hoek

Rumannan:
Ina y Ramon
Rolando y Carmen 'Elichí'
Hubert y Blanca
Marlene 'Inchi'

Sobрино(a)nan:
Tammi, Michelle, Mark, Jose y respectivo
famia Kiala y Ranzino

Omo y tantanan:
Castro Perez
Urbano Perez
Aroldo Perez
Filomena de Cuba-Perez

Sua y Cuñanan:
Frido, Sheryl y famia
Wimpy, Soraya y famia
Mariana, Gos y famia
Roy y yunan

Mescos ruman:
Jackie y Hubert
Shantelle y Marcus

Primo y primanan, famianan, amigo y
amiganan y coleganan musico

Ta invita pa e acto di despedida cual lo
tuma lugar **diasabra 24 di juni 2023**, na
Aurora Funeral Home, di 8:00 or pa 11:00 or
di mainta. Respons lo ta di 10:30 pa 11:00
or. Cremacion lo tuma lugar den seno
familiar.

Blessed

ARE THE PURE IN HEART,
FOR THEY WILL SEE GOD.

MATTHEW 5:8



Lo E seka tur lagrima for di nan wowo, y
morto lo no eksisti mas: lo no tin nada di
rou, nada di yoramentu, nada di dolor mas,
pasobra tur kos di antes a pasa bay.'
(Revelation 21:4)

Cu inmenso tristesa na nos curason nos ta
anuncia fayecimento di nos mama, wela y
tanta stima:

Jacqueline A. Laclé

* 22/12/1963 - †18/06/2023

Mihor conoci como: "Jacky"

Na number di su:

Mama:
†Elda I. Laclé

Yiunan:
Freja y Gabriel Muñoz Concepcion
Tiziana Molina y Donald Kock

Manera yiu:
Jeremy Cardoze, Yollene Marin y yunan

Nietanan stima:
Jaidi-anne, Naarah, Choy-xzien, Tixzien y
Deysha

Rumannan:
Clayde Laclé y famia
Richard Laclé

Tata di su yunan:
Freddy Molina

Bisiña ruman:
Grace Henriquez

Sobрино y sobrinanan

Primo y primanan

Ihanan:
Jerry (Kai-fu) Chai, Jah Inocencia

Demas famia:
Laclé, Molina, Muñoz Concepcion, Koc,
Kock, Cardoze, Roos, Willems, Marin,
Flanegin, Oosterhuis, Arcaya, Pieters,
Solognier, Chai, Inocencia, Gilkes, Arrindell,
Roberts, Simileer, Forero, Martinez, Franken,
Henriquez, Goeloe, Cellaire, Lamothe y
Maduro

Na tur su amiganan stima y su rumannan
den Cristo

Un danki special na su Iglesia Pentecostal di
Aruba
Pastor Andy y Ingrid Centeno, Pastor
Balootje, Piscadornan di Jaburibari

Ta invita na acto di entiero cu lo tuma lugar
Diasabra 24 di Juni, di 2pm pa 4pm na
Aurora Funeral Home, despues pa santana
na Sabana Basora.

Nos disculpa si den nos tristesa nos por a
lubida un of otro famia.

Despues di entiero nos no lo ricibi bishita di
condolencia na cas.



AWEMainta

Scan nos QR code y bira abonado di AWEMainta

Completamente GRATIS

1: Usando bo camera di telefon,
scan nos QR code na banda.

2. Bay riba "Show Options",
"Open in browser".

3. Yena e formulario.

**Haya AWEMainta
tur dia den bo inbox!**



www.awemainta.com



www.facebook.com/AWEMainta



5880022



info@awemainta.com
noticia@awemainta.com
aviso@awemainta.com